

INUIT ATAQATIGIIT INATSISARTUNI



UPA2023/25

25.09.24.

Peter Olsen

Uunga siunnersuut: Filmiliortarneq pillugu Inatsisartut inatsisaat

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Oqaaseqaat:

Naalakkersuisut filmiliortarneq pillugu Inatsisartut inatsissatut siunnersutaannut tusarluarnartumut nuannersorujussuarmullu qujanarujussuaq. Torrak taali tassa ajunngilluinnarpoq nunatsinni filmiliortarneq pillug kiisami ingerlariaqqillutalu pitsaasup tunngaanut alloriartussanngulerpugut.

Kiisami.... Taannaqa.....

Inuit Ataqatigiinni nunatsinni filmiliortarnerup tungaatigut inerisaaqqittoqarnissaanik siuarsaaqqittoqarnissaanniillu oqariartuuteqartarsimanerput asuli oqaasiinnaangitsoq ugguuna inatsisissatigut uppersarnerqarpoq anguneqartussanngulerlunilu. Inuit Ataqatigiinni siunertarput timitalerneqarlunilu naqissuserneqartussanngorpoq. Tamanna filmililiortartut sinnerlugit nuannaarutigaaqput tulluusimaarutigalugulu.

Uuma inatsissap anguniarsarinerineqarnerata aqputaani nunatsinni filmiliortartut suleqatigisimaqaagut, kissaataannik angorusutaallu paasinnilluarlutalu tusarnaartarsimaqaagut.

Siorna 2023-mi ukiakkut ataatsimiinnitsinni siunnersuuteqarpugut ima qulequtsersimasatsinnik; Filmiliortarneq pillugu inatsimmik UKA24-mi pilersitseqqullugit Naalakkersuisut peqquneqarnissaanik inatsisartut aaliangiiffigissassaattut siunnersuut.

Taamatullu siunnersuuteqarsimanitsinnut ilaatigut tunngaveqarpoq nassuiaammiit 2023-mi upernaakkut Naalakkersuisut saqqummiussimasaannit imatut qulequtserneqarsimasumit; *“Kalaallit Nunaanni filmiliortarnerup qanoq ilillugu pitsanngorsaqaqarsinnaaneranut siunnersuutit”*

Tassanilu film.gl aqputigalugu nunatsinni filmiliortartut kissaataat assigiinngitsorpassuit ersarissaatigineqarsimallutik.

INUIT ATAQATIGIIT INATSIARTUNI



Taassuma sanatigut upernaq manna ataatsimiinnitsinni ima qulequtalinnik assigiinngitsunik marlunnik aamma siunnersuuteqarsimalluta;

Nunatsinni Filmiliortut aningaasartuutiminnit 25%-mik utertitsisalernissaat pillugu inatsimmik UKA24-mi suliniuteqaqqullugit Naalakkersuisut peqquneqarnissaannik inatsisartut aaliangiiffigisassaattut siunnersuut.

Aamma.....

Filmiliortut isiginnaartitsisartullu nunatsinneersut nunarsuatta sinnerani filmiliaminnik filmilianiluunniit peqataaffigisaminnik takutitsisoqassatillugu peqataanissamut qanoq tapersorneqarsinnaanerit pillugu apeqquteqaat aallaavigalugu oqallisissiaq.

Naalakkersuisullu siunnersuutaanni aamma uani inatsisissap nassuiataani atuarneqarsinnaasut ilagaat una siunnersuut ilaatigut qulaani siunnersuutigisimasagut tunngavigalugit inatsisissaq aamma ilusilersorneqarsimasoq.

Tassami ilumoorluinnaqqissaarpoq; Nunatsinni tanngassimaarutissatta nuannaarutissattalu ilaat tassaavoq nunatsinni eqqumiitsuliortortatta akornanni amerligaluttuinnarlutillu pikkorissigaluttuinnarnerat. Assersuutigiinnarlugu Nuummi filmiortortarfiup 2019-kkunnili pilersinneratigut filmiortarneq soqutineqaleraluttuinnarsimavoq filmiliortartullu amerliartuaarusaalersimallutik

Filmiliornerup silarsuaani qiviaannarsinnaavugut Ujarneq Fleischer, Marc Fussing Rosbach, Inuk Silis Høegh, Emile Hertling Péronard, Pipaluk Kreutzmann Jørgensen aammalu Ulannaq Ingemann; kingulliillu taakku eqqaassagaanni taakkupput nunarput sinnerlugu filmiliornikkut nunarsuup sinneranut appakkaakkiartuaalersimallutillu, nunarput sinnerlugu takutitsilluartalereersimasut.

Siorna Filmiliortarneq pillugu Naalakkersuisut inatsilioqqullugit siunnersuuteqaratta ilaatigut ima aamma tunngavilersuuteqarsimavugut: Minnerunngitsumillu filmiliortarnermut tunngatillugu ilisimatusarfimmu, tassa qallunaatut Film Institut-mik taaneqarsinnaasumik pilersinneqarumaartussamut aammalu isumalioqatigiissitamut pilersinneqarsinnaasumut aamma aaliangersakkamik inatsisissaq una pineqartoq imaqartinneqarsinnaalluni.

Inuit Ataqtiginiinnit nuannaarutigeqaarput filminstituti inatsisissaq una tunngavigalugu pilersinneqartussanngulermit minnerunngitsumillu aamma filmkommisærimut tunngasoq.

Filminstitutip pilersinneqarneratigut filmiliortartut nammineerlutik aningaasanik agguanneqartartussanik aqutsisinnaanngortinneqarnissaat nuannaarutigaarput.

INUIT ATAQATIGIIT INATSIARTUNI



Uuma inatsissap aamma filminstitutip pilersinneqarneratigut ilaatigut; Filmiliortartugut filmiliaminnik nunani allani takutitsiartornissaannut aammalu isiginnaartitsisartut nunat allamiut filmiliaannut peqataaffigisimasaminnut takutitseqqaarnissaannut peqataajartornissaannullu, angalanermut tapiiffineqarsinnaalersinnaaneq aqutissiuunneqassaaq. Massakkut tamanna periarfissaanngilaq

Aningaasaliissutigut imaluunniit tapiissutigisartakkavut aningaasartuutaannartut isigineqassanngillat, siunissamulli aningaasaliinertut isigineqartariaqarput. Filmiliortartut aammalu isiginnaartitsisartut nunani allani peqataanermikkut nunarput avammut nittarsaalluartaapaat, soqutineqalersittarlugulu.

Filmiliortartugut isiginnaartitsartullu nunani allani attavinnik suleqatissaminnillu angalanermikkut pissarsiaqassapput, siunissami inuttut aningaasarsiornikkullu iluaqutigilerumaagassaminnik pissarsiaqassapput; inuit ataasiakkaat aningaasatigut iluaqutissaat aamma nunatta aningaasatigut iluaqutigilerumaassavaat.

Angalanernut, siunertanut tamaattunut eqqumiitsuliornermut aningaasaateqarfimmiit, tipsernermit lottornermilu aningaasalissutiningaaniit aammalu namminersorlutik oqartussat iluani kultureqarnermut aningaasaliissutigisartakkaniit allanit tamanit, inatsisit tunngavigalugit tapiissuteqartoqarsinnaanngilaq. Inatsisigut tunngavissaqanngilagut siunertanut tamaattunut qinnuteqaatinut tapiissuteqarnissatsinnut.

Tamannali aqutissiuunneqarsinnaalissaaq uuma inatsisissap piviusunngortinneqarneratigut.

Naggaatigut:

Qilanaarpugut uuma inatsisissap piviusunngortinneqarnissaanut. Taamaattorli erumatigisatta ilaat taasaavoq aningaasalersorneqarnissaanut tunngasoq. Aningaasanut inatsisissami 2025-moortumi ajoraluartumik immikkut ittumik uunga siunertamut aningaasaliissuteqartoqarsimannginnera maluginiakkatta ilagaat. Taamaattumik kissaatiginartissavarput aappassaaneerneqarnissaanut uuma siunertaasup qanoq aningaasarlorsorneqarnissaa pillugu naalakkersuisut nassuiaateqarnissaat kissaatigaarput.

Taama oqaaseqarluta immikkoortoq una aappassaaneerneqannginnerani kulturimut ilinniartitaanermullu ataatsimiitiliamut suliaassanngorlugu ingerlateqqipparput.

Qujanaq